

嵩山文集

十

四部叢刊續編

嵩山文集

(82203.1)

中華民國二十三年十一月初版

本書實價國幣捌元伍角

外埠酌加運費匯費

發行人

王

雲

五路

印刷所

上海商務印書館

河南商務印書館

南路

發行所

上海商務印書館

及各埠

館

文集卷第十九

嵩山景迈生晁說之字以道一字伯以

傳

楊雄別傳上

楊雄字子雲蜀郡成都人也周幽王封宣王子
尚父于楊號曰楊侯其後并于晉河東有楊氏
孫遂以楊為氏雄本晉之楊自其五世祖遷徙
諸蜀雄少而簡易清淨好古孝從同郡嚴君平
遊顏尚好辭賦宗司馬相如嘗嘆曰長卿賦不

從人間來其神所至耶初相如與枚乘孽子臯
思敏疾相如頗淹遲有以二人問者雄
曰軍旅之際戎馬之間飛書馳檄用枚臯廊廟
之下朝廷之中高文大冊用相如然帝於辭賦
自俊捷亦苦相如之艱嘗謂相如曰以吾之速
易子之遲可乎相如曰于臣則可未知陛下何
如耳蓋相如亦自謂有所短而雄之論乃如此雄
嘗作縣邛銘王伉頌階闥銘成都城四隅銘蜀人
有楊莊者為郎誦之于成帝成帝好之以為似

相如雄遂以此得見待詔承明之庭時永始四年也雄年四十矣帝方以正月郊祠甘泉詔雄賦甚遽雄蒼猝應詔其賦極瓌瑋盡諷戒之義乃三月帝帥羣臣橫大河湊汾陰以祀后土雄又作河東賦以帝好廣宮室又作子虛賦以諷戒帝多玩書善雄賦頌出入遊獵雄必從十二月帝縱胡人羽獵雄因作羽獵賦雄既待詔歲餘給事黃門為郎後一歲帝又命雄作繡補靈節龍骨之銘詩三章帝得之喜甚當時之語曰

玩子雲之篇章樂于居千石之官西羌嘗有警
 帝思將帥之臣追美趙充國詔雄即未央宮充
 國圖畫為頌綏和元年秋帝大誇胡人多禽獸
 復幸長楊縱胡客大校獵雄復作長楊賦上之
 比以諷帝雄為郎時自奏少不得奉而好沈博
 絕麗之文願不受三歲之奉且休晚直事庶得
 肆心廣意以自克就有詔可不奪奉令尚書賜
 筆墨錢六萬得觀書于石渠時京師班嗣者右
 曹中郎將遊之子顯名當世遊嘗賜秘書之副

而嗣為人好賢從雄遊雄由是內外之書無不
觀矣然非聖不好也時人稱雄曰西道孔子有
張子侯者問沛郡栢譚曰楊子雲西道孔子乃
貧如此譚曰子雲亦東道孔子也昔仲尼豈獨
為魯孔子而不能為齊楚聖人耶王公子亦問
子雲于譚曰漢興以來未有斯人雄雖甚貧
而輕財惡利無所事于世作逐貧賦以自見曰
楊子遁世離群獨處左隣崇山右接曠野隣垣
乞見終貧且窶禮薄義弊相與群聚惆悵失志

呼貧與語汝在六極投棄荒遐好為庸卒刑戮
是加匪惟幼稚嬉戲土沙居非近鄰接屋連家
恩輕毛羽義薄輕羅進不由德退不受呵久為
滯客其意若何人皆文繡余褐不完人皆稻粱
我獨藜食貧無宝玩何以接歡宗室之宴為樂
不槃徒行負債出處易以身服百後手足胼胝
或耘或耔霜露肌膚朋友道絕進官凌遲厥咎
安在職汝之為舍汝遠竄崑崙之顛尔復我隨
翰飛戾天舍爾登山巖穴隱藏尔復我隨陟彼

高岡舍尔入海汎彼栢舟尔復我随載沉載浮我
行尔動我靜尔休豈無他人從我何求今汝去
矣勿復久留貧曰唯、主人見逐多言益嗤心
有所懷願得盡辭昔我乃祖崇其明德克佐帝
堯誓為典則土階茅茨匪彫匪飾爰及季世縱
其昏惑饕餮之群貪富苟得鄙我先人乃傲乃
驕瑤臺瓊室華屋崇高汙酒為池積肉為嶠是
用鵠逝不踐其朝三省吾身謂予無讐處君之
家福祿如山忘我大德思我小怨堪寒堪暑少

而習焉寒暑不忒苟壽神仙桀跖不顧貪類不
千人皆重蔽子独露居人皆怵惕子獨無虞言
辭既罄色厲目張攝齊而興降階下堂誓將去
汝適彼首陽孤竹之子與我連行余乃辟席辭
謝不直請不貳過聞義則服長與尔居終無厭
極貧遂不去與我遊息哀帝時丁傳董賢用事
人皆媚之以貴富雄独安于郎署而大覃恩渾天
或者信蓋天之季詆渾天雄乃歎八難：蓋天
以通渾天云日東行循黃道畫中規牽牛距北

極北百一十度東井距北極南七十度并百八十度周三徑一二十八宿周天當五百四十度今三百六十度何也春秋分之日正出在卯入在酉而晝漏五十刻即天蓋轉夜當倍晝今夜亦五十刻何日入而星見日出而星不見即斗下見日六月不見日六月北斗亦當見六月不見六月今夜常見何也以蓋圖視天河處斗而東入狼孤間曲如輪今視天河直如繩何也周天二十八宿以蓋圖視天星見者當少不見者

當多今見不見苟何出入無冬夏而兩宿十四
星常見不以日長短故見有多少何也天至高
地至卑日託天而旋可謂至高縱人目可奪水
與景不可奪今從高上山以水望日日出水下
影上行何也視物近則大遠則小今日與北斗
近我而小遠我而大何也視蓋橈與車輻間近
杠轂密益遠益疎今北斗為天杠轂二十八宿
為天橈輻以星度天南方次地星間當數倍
今密何也時獨相譚信雄季雄與譚嘗同奏

事待報坐西廊廡下以寒暴背雄語譚曰蓋天
以天如推磨石轉而日西行者其光景當照此
廊下稍而東耳不當拔出去拔出去是應渾天
法渾為天之真形于是可知雄按渾天著書曰
大玄曰玄也者兼天地人之道而天名之或曰
述而不作玄何以作雄曰其事則述其書則作
或曰玄何為雄曰為仁義或曰孰不為仁孰不
為義雄曰勿雜而已矣雄于玄用思甚苦嘗夢
吐白鳳集玄上久之而滅或曰無為自苦故難

傳當時儒士劉歆張竦輩雖與雄善狃于玄弗
好也雄知時人所好在彼不在此乃作太玄賦
曰觀大易之損益兮覽老子之倚伏省憂喜之
共門兮察吉凶之同域皦々著乎日月兮何聖
人之暗燭豈惛寵以冒灾兮將吮臍之不及若
飄風不終朝兮驟雨不終日雷隆隱而輒息兮
火猶熾而速滅且夫物有盛衰兮况人事之所
極奚貪婪于富貴兮迄喪躬以危族豐盈禍所
栖兮名譽怨之所集薰以芳而致燒兮膏合肥

而見煇翠羽嫩而殃身兮蚌含珠而擘裂聖作
典以濟時兮驅蒸民而入甲張仁義以為綱兮
懷忠貞以矯俗指尊選以誇世兮疾身沒而名
滅豈若師由聃兮執玄靜于中谷納媯祿于江
淮兮揖招喬于華岳升崑崙以散髮兮踞弱水
以濯足朝發軔于流沙兮夕翱翔乎碣石忽萬
里而一頓兮遇列仙以訖宿後青要以承代兮
舞馮夷以作樂聽素女之清聲兮觀宓妃之妙
曲茹芝英以禦肥兮飲玉醴以解渴排閭闔以

窺天庭兮騎驂騁以蛟螭載羨門與僊遊兮永
周覽于八極亂曰其餌含毒難數嘗兮麟而可
羈近犬羊兮鸞鳳高翔戾青雲兮不卦罔羅固
足珍兮斯錯位極離大戮兮屈子慕清蕤魚腹
兮伯姬曜名炙厥身兮孤竹二子餓首山兮斷
跡屬婁何足云兮譬斯數子智若淵兮我異于
是孰太玄兮蕩然肆志不拘事兮獨鉅鹿侯芭
授玄于雄為玄章句相譚亦好之然不若好雄
賦之甚也譚嘗問雄曰何以能賦雄曰能讀千